

I. DISPOSICIÓN XERAIS

MINISTERIO DO INTERIOR

11429 *Real decreto 949/2015, do 23 de outubro, polo que se aproba o Regulamento do Rexistro Nacional de Asociacións.*

I

O dereito fundamental de asociación, recoñecido no artigo 22 da Constitución española, foi desenvolvido pola Lei orgánica 1/2002, do 22 de marzo, reguladora do dereito de asociación.

Esta lei orgánica, que ofrece unha regulación integral do dereito de asociación, asentado constitucionalmente no principio de liberdade asociativa, desposúe os poderes públicos, por unha banda, de potestades de control preventivo ou, como di a propia lei, de facultades que puideren entrañar un control material de legalización ou recoñecemento das asociacións e, por outra, de atribucións que supoñan intervención ou inxerencia no seu funcionamento interno. Desta maneira, as asociacións nacen ao dereito desde o mesmo momento do acordo fundacional adoptado polos promotores, adquirindo personalidade xurídica e plena capacidade de obrar, e dótanse das súas propias regras de organización e funcionamento a través dos correspondentes estatutos.

Non obstante, por razóns de seguridade xurídica, é unha práctica consolidada no noso dereito a facultade das asociacións de inscribirse nun rexistro que, como queda exposto, carece de calquera efecto constitutivo e se realiza co único obxecto de dar publicidade á súa existencia. É por isto que os principios de liberdade e voluntariedade que fundamentan o exercicio do dereito de asociación son compatibles coa constancia das asociacións nos rexistros administrativos para os únicos efectos de publicidade. En concreto, a inscrición fai pública a constitución e os estatutos das asociacións e é garantía non só para os socios senón tamén para os terceiros que con elas se relacionan. A inscrición, por tanto, a pesar do seu carácter simplemente declarativo, é un acto de indubidable importancia para a seguridade do tráfico xurídico, no cal de forma crecente interveñen as entidades asociativas desenvolvendo actividades de moi variada natureza, económicas, prestacionais, asistenciais, de asesoramento, promoción ou defensa de intereses.

II

Desde o punto de vista da organización, o capítulo V da Lei orgánica 1/2002, do 22 de marzo, refírese aos distintos rexistros de asociacións, entre eles, o Rexistro Nacional de Asociacións.

Atribúeselle ao Rexistro a competencia para a inscrición das asociacións de ámbito estatal, daquelas que non desenvolvan principalmente as súas funcións no ámbito territorial dunha comunidade autónoma e das asociacións estranxeiras que exerzan actividades en España de forma estable. Polo demais, o artigo 25 da dita lei orgánica remite a desenvolvemento regulamentario a determinación da súa dependencia orgánica, estrutura e funcionamento.

Tal previsión cumpríuse mediante a publicación do Regulamento do Rexistro Nacional de Asociacións e das súas relacións cos restantes rexistros de asociacións, aprobado polo Real decreto 1497/2003, do 28 de novembro. Este regulamento, estruturado en tres títulos, regulou os diferentes procedementos de inscrición, estableceu a dependencia orgánica, a organización e o funcionamento do Rexistro, e as súas relacións con outros rexistros de asociacións e co resto de administracións públicas.

Porén, transcorridos máis de dez anos desde a súa aprobación, puxéronse de manifesto algunhas carencias e deficiencias que impiden mellorar a prestación dun servizo público que beneficia un amplo espectro da sociedade española. Moito máis se se ten en

conta que o Rexistro Nacional de Asociacións cobrou unha progresiva importancia como consecuencia da propia vitalidade do movemento asociativo. Se no momento da entrada en vigor da Lei orgánica 1/2002, do 22 de marzo, o número de asociacións inscritas neste rexistro apenas superaba as 20.000, na actualidade esa cifra aproxímase ás 50.000.

Os aspectos susceptibles de mellora alcanzan todos os contidos da vixente norma, polo que a súa modificación parcial impediría realizar a reforma global e coherente que se persegue, ordenada a satisfacer tanto as necesidades dos cidadáns, que demandan uns procedementos administrativos máis claros e sinxelos, como as necesidades do propio Rexistro, que precisa actualizar a súa estrutura e o seu funcionamento a partir da experiencia acumulada, da recepción dos principios e regras comúns aos rexistros públicos de persoas xurídicas e das posibilidades que ofrecen hoxe os distintos instrumentos da Administración electrónica.

Todo o anterior conforma un conxunto de motivos que aconsellan a elaboración dunha nova norma regulamentaria, a través da cal se dea satisfacción aos obxectivos que se persegue. Por unha banda, facilitar aos cidadáns o cumprimento das súas obrigacións formais. Por outra, configurar o Rexistro como un servizo público transparente, áxil e tecnoloxicamente avanzado. E, por último, favorecer a accesibilidade a información rexistral completa, fiable e de calidade, como garantía para a seguridade xurídica. Unha información completa e actualizada que debe estar á disposición tanto dos cidadáns como das administracións públicas e dos tribunais de xustiza cando estas institucións a requiran para o exercicio das súas funcións.

Todo isto desde o absoluto respecto ao principio de intervención mínima, de tal forma que ao Rexistro se lle atribúen as funcións indispensables para practicar con garantías a inscrición e a actualización dos datos das asociacións.

III

O regulamento adopta unha estrutura diferente e máis lóxica; comeza por abordar a configuración mesma do Rexistro para despois regular as distintas formas de practicar as inscricións. En concreto, estrutúrase en tres títulos, mediante os cales se establecen as disposicións xerais e os principios reitores; se ordena a organización e o funcionamento do Rexistro e se establecen as regras de colaboración cos demais rexistros de asociacións; e se regulan as distintas formas de inscrición, con particular atención aos procedementos de inscrición iniciados por solicitude dos interesados.

O título preliminar recolle as disposicións xerais, referidas ao obxecto do Rexistro, o seu carácter e dependencia orgánica, que se mantén no Ministerio do Interior, e aos principios ordenadores do seu funcionamento.

Defínese con claridade que o obxecto do Rexistro é a inscrición das asociacións non lucrativas de ámbito estatal que poidan ser cualificadas de xerais ou de réxime común, polo que, por unha banda, quedan excluídas as asociacións de ámbito autonómico e, por outra, as asociacións para cuxa inscrición a lexislación específica prevexa os correspondentes rexistros especiais.

Pola súa parte, para non desvirtuar a natureza dos tipos de agrupacións de asociacións que recolle a lei orgánica, ofrécese por primeira vez o concepto de federación, confederación e unión, que se definen como entidades asociativas de segundo grao, que unicamente poden estar promovidas por persoas xurídicas de natureza asociativa e inscritas no correspondente rexistro de asociacións.

Os principios configuradores, en liña cos que son propios deste tipo de rexistros, recóllense como pautas orientadoras que sirvan á integración e interpretación da norma.

Ademais, plásmase unha realidade consolidada pero que agora se explicita e se impulsa, como é a xestión do Rexistro, a práctica dos asentos, o almacenamento da información e a relación cos cidadáns a través de medios informáticos e telemáticos, conforme os principios recollidos na lexislación reguladora do acceso electrónico aos servizos públicos e os esquemas nacionais de seguridade e interoperabilidade, que constitúen o contexto normativo en que enmarcar as actuacións de natureza electrónica que para o Rexistro se sinalan ao longo do texto. En particular, prevese a posibilidade, xa

establecida para outros rexistros públicos, de acceso directo aos datos do Rexistro por parte das administracións públicas e dos órganos xudiciais, sempre con motivo do exercicio das súas funcións e baixo a súa responsabilidade.

O título I regula a organización e o funcionamento do Rexistro.

Por unha banda, acométese unha importante simplificación da súa estrutura, que se organiza en catro seccións, acorde coa atribución de competencias que realiza o artigo 25 da Lei orgánica 1/2002, do 22 de marzo, que exclúe para o dito rexistro calquera función rexistral respecto das asociacións de ámbito autonómico e aquelas suxeitas a un réxime específico. Desta maneira, as seccións establécense para o exclusivo tratamento das asociacións, das federacións, confederacións e unións de asociacións de ámbito estatal, das asociacións xuvenís de idéntico ámbito de actuación e das asociacións estranxeiras que actúen de forma estable ou duradeira en España. Ademais, en canto que servizo ao cidadán, establécese o ficheiro de denominacións, o seu contido e forma de acceso, cuxo obxecto é dar a coñecer as entidades previamente inscritas nos rexistros de asociacións, co fin de evitar a duplicidade ou semellanza de denominacións.

Por outra, determínanse e desenvólvense as funcións do Rexistro, limitadas a cualificar e inscribir os actos que deban acceder a el, depositar a documentación preceptiva e dar publicidade aos asentos e documentos. En concreto, sinalase qué actos asociativos son susceptibles de inscrición e qué documentos son de obrigado depósito, e regúlanse as distintas formas de dar publicidade ao contido dos asentos e dos documentos, con respecto, en todo caso, da normativa sobre protección de datos de carácter persoal.

Dentro deste título destacan as seguintes novidades.

Regúlanse e defínense os distintos tipos de asentos que se poden practicar no Rexistro, superando o estreito concepto de inscrición e rectificación que ata agora permitían as follas rexistrais. Preténdese con isto dar cabida a calquera circunstancia de relevancia rexistral que se produza durante a vida da asociación e clasificala segundo a súa natureza, que permita ter unha información completa e ordenada que sirva con eficacia ao esencial principio de publicidade.

A folla rexistral, soporte dos asentos, configúrase como «folla electrónica rexistral», por canto o tratamento da información se fará exclusivamente a través de procedementos electrónicos.

Cóbrese, ademais, un importante baleiro legal mediante a regulación de dúas situacións de indubidable importancia para o tráfico xurídico, como son as fusións e transformacións de asociacións, que ata agora non tiñan adecuada constancia. Establécese, por tanto, a forma de inscribir tanto o suposto de fusión entre dúas ou máis asociacións para crear unha nova, como o de fusión por absorción, así como se define, para os únicos efectos deste regulamento, qué se entende por transformación. Dentro deste concepto compréndese tanto a modificación do ámbito territorial de actuación, de estatal a autonómico e viceversa, como o cambio de réxime xurídico da asociación, cando esta deixa de se rexer polo réxime xeral e común da Lei orgánica 1/2002, do 22 de marzo, para someterse a un réxime asociativo específico e viceversa.

Destácase a importancia de establecer de forma precisa o réxime das asociacións que se transforman, ben por redución de ámbito ou por suxeición a un réxime xurídico especial, por canto con isto se eliminan as posibles situacións de inseguridade xurídica ou indeterminación de responsabilidades que poidan derivar da ausencia de publicidade durante o tempo que dista entre a baixa no Rexistro e a alta noutro rexistro distinto. Para isto, mediante a figura da baixa provisional, establécese o mantemento da asociación transformada no Rexistro ata que se teña constancia fidedigna da súa inscrición no rexistro autonómico ou especial que corresponda.

De forma inversa, establécese a canle formal para inscribir no Rexistro aquelas asociacións inicialmente inscritas nos rexistros autonómicos e especiais pero que, con posterioridade, deciden ampliar o seu ámbito de actuación a todo o territorio do Estado ou modificar o seu réxime xurídico para se suxeitaren ao réxime xeral e común da Lei orgánica 1/2002, do 22 de marzo, respectivamente. Aínda que estes casos supoñen que tales entidades acceden por primeira vez ao Rexistro, simplifícanse as obrigas formais exixidas

no momento de presentar a solicitude, e será o propio Rexistro o que, de oficio, requira ao órgano competente os antecedentes necesarios para completar o expediente. Polo demais, as entidades quedan suxeitas a todos os contidos do regulamento que regula o Rexistro Nacional de Asociacións.

Sen dúbida, un dos aspectos máis relevantes das asociacións, como é en xeral para todas as persoas xurídicas, é a necesidade de identificalas mediante unha denominación que as singularice e distinga en canto que suxeitos de dereito.

A denominación afecta a identidade das asociacións, individualiza as súas actuacións e incide directamente na seguridade do tráfico xurídico.

Por isto, sobre a base dos requisitos legais de idoneidade, licitude e dispoñibilidade, recóllese con certo detalle un conxunto de criterios que deben ter en conta, por unha banda, as entidades asociativas no momento de establecer a súa denominación e, por outra, o propio Rexistro para abordar con garantías as emendas que, se é o caso, resulten necesarias. Tales criterios de actuación, ademais, encóntranse amplamente asentados en todos os rexistros públicos de persoas xurídicas, xa sexan estatais ou autonómicos.

Con esta precisa regulación preténdese facilitar o establecemento da denominación, xa que a lei orgánica, ademais de prohibir a identidade de nomes, tamén prohibe a semellanza, aínda que esta só no caso de que poida crear confusión. Ben que o suposto da identidade ofrece menos dúbidas, non obstante o cal se establecen os criterios necesarios para evitar a duplicidade de nomes, o da semellanza exige aos cidadáns realizar unha dobre valoración: a primeira, apreciar a semellanza, e a segunda, determinar se pode chegar a xerar equívocos no tráfico xurídico.

Por tanto, considérase que os requisitos e límites que se establecen resultan da máxima utilidade tanto para os interesados, no momento da constitución da asociación, como posteriormente para o Rexistro, durante o procedemento de inscrición, xa que reducen as marxes de discrecionalidade que, ata agora, por falta dunha máis completa regulación, incidían de forma negativa na seguridade xurídica.

Como novidade, elimínase para o interesado a carga de presentar en todo caso un certificado de tradución da denominación, cando esta está nunha lingua oficial distinta do castelán ou nun idioma estranxeiro, que só poderá ser requirido polo Rexistro cando se considere necesario.

Ademais, por entender que se corresponden cun ámbito distinto e que do seu uso poden derivar situacións confusas, non se admitirán as denominacións que inclúan dominios da internet tales como «.es», «.com», «.net» e «.org», entre outros.

Tamén, para o caso de fusión, se prevé que a asociación absorbente ou a nova asociación resultante da fusión poidan adoptar como denominación a de calquera das que se extingan por virtude da fusión, quedando sen efectos as restantes denominacións.

Polo demais, e dentro aínda deste título, régulanse algunhas cuestións que afectan a codificación de actividades, a permanente actualización da identidade dos membros dos órganos de representación e as asociacións estranxeiras, e detállase o tratamento rexistral que se debe dar a algunhas situacións de especial relevancia como as de transformación e fusión, as discrepancias de orde interna e o importante acto de disolución das asociacións. Todos eles son aspectos que inciden no funcionamento do Rexistro e que, ben pola súa novidade ben por exixilo a xestión diaria, deben ter unha regulación expresa.

Polo que se refire, en concreto, ás discrepancias entre socios que se comuniquen ao Rexistro, lémbrese, desde o principio de non inxerencia da Administración no funcionamento das asociacións, que o Rexistro non tramitará ningún escrito polo cal os socios comuniquen diverxencias desta natureza e que só terán reflexo rexistral aquelas discrepancias de orde interna que fosen obxecto de demanda xudicial e así se acredite mediante a presentación desta e da súa admisión a trámite.

Con pleno respecto ao principio de distribución de competencias entre o Estado e as comunidades autónomas e de atribución de competencias entre órganos administrativos, establécense dúas importantes regras de actuación, concretadas en que as solicitudes de inscrición que presenten ante o Rexistro as asociacións autonómicas e especiais se remitirán ao órgano competente para a súa tramitación. Respecto destas últimas, é dicir,

das asociacións suxeitas a un réxime xurídico específico, cuxa inscrición nun rexistro especial resulte obrigatoria, só se admitirán as solicitudes cando unha norma estatal con rango de lei estableza a súa inscrición previa no Rexistro Nacional de Asociacións. Con esta segunda regra, ademais, preténdense evitar supostos de dobres inscricións, non amparados pola Lei orgánica 1/2002, do 22 de marzo, excepto que, polo menos, unha lei estatal impoña para os cidadáns a carga de solicitar dúas veces, en dous rexistros distintos, a inscrición dunha mesma asociación.

Finalmente, establécense as relacións de colaboración entre o Rexistro e os demais rexistros de asociacións e outros rexistros públicos e órganos administrativos, e sinálase expresamente que, en todo caso, facilitará a información rexistral que lle sexa requirida polos xulgados e tribunais.

O título II está referido aos procedementos de inscrición.

Distinguese por primeira vez entre as inscricións practicadas por solicitude dos interesados e aquelas que se realizan de oficio. Entre estas últimas encóntranse as inscricións ordenadas polos xulgados e tribunais, cuxas resolucións comunicarán directamente ao Rexistro, o que permitirá eliminar para os interesados a obriga de presentar ante o Rexistro as correspondentes solicitudes de inscrición e constancia. Tamén terán a consideración de inscricións de oficio as que se refiren á declaración e revogación de utilidade pública das asociacións, xa que a competencia reside no propio Ministerio do Interior e se trata de actos de obrigatoria publicación no «Boletín Oficial del Estado».

En canto aos procedementos de inscrición propiamente ditos, tamén se distingue por primeira vez entre as normas comúns a todos os procedementos e as específicas para cada un deles.

O capítulo I, sobre normas comúns, recolle as xerais do procedemento administrativo xunto coas previstas na Lei orgánica 1/2002, do 22 de marzo. Así, establécese un procedemento completo nas súas distintas fases de iniciación, instrución e resolución, onde teñen reflexo aspectos como os requisitos exhibibles ás solicitudes, prazo de presentación, trámite de emenda, petición de informes a outros órganos administrativos, audiencia, prazo de resolución, efectos do silencio e recursos que proceden contra os actos de inscrición ou de denegación da inscrición.

Dentro deste capítulo destaca o establecemento dunha mínima prevención para cando os interesados comuniquen fóra do prazo legal dun mes a modificación ou actualización dos datos que constan no Rexistro. En ningún caso se rexeitará a inscrición da nova información, pero poderase requirir un certificado acreditativo de que esta está vixente, pois só a permanente correspondencia do Rexistro coa realidade extrarrexistral permite dar satisfacción ao principio de publicidade.

Tamén se extrae do procedemento administrativo común a posibilidade do instrutor de solicitar informe a outros órganos administrativos cando a denominación, os fins, as actividades e outros contidos estatutarios poidan afectar o ámbito das súas competencias, en particular, para evitar que a dita denominación se poida confundir con calquera de carácter oficial ou que os fins poidan supoñer o exercicio pola asociación de funcións públicas de carácter administrativo. Esta opción revelouse como necesaria nun gran número de procedementos de constitución de asociacións, de transformación de asociacións, de modificación de estatutos e de apertura de delegacións en España de asociacións estranxeiras, polo que se acolle de maneira expresa co obxecto de proporcionar ao Rexistro, en cada caso, os elementos de xuízo necesarios para resolver.

Tamén se considera relevante que a norma recolla expresamente o suposto de denegación da inscrición solicitada, cando a asociación non cumpra os requisitos xerais establecidos na lei, ou cando se trate de entidades que non presentan a natureza xurídica de asociación ou están directamente excluídas do ámbito de aplicación da Lei orgánica 1/2002, do 22 de marzo. Este tipo de resolución queda amparada polos artigos 24 e 30.3 da dita lei orgánica e pola propia xurisprudencia constitucional, que só entende lesionado o exercicio do dereito fundamental de asociación cando a denegación rexistral carece de adecuada motivación ou se pode cualificar de infundada ou arbitraria.

Pola súa parte, o capítulo II relaciona todos os posibles procedementos de inscrición e detalla para cada un deles os requisitos específicos que deben ter en conta os interesados no momento de formular a solicitude e presentar a documentación preceptiva. A este respecto destácase que se elimina a carga que para os interesados supón presentar por duplicado a acta fundacional e os estatutos iniciais ou modificados. Elimínase, por tanto, unha obriga que, curiosamente, se mantivo constante no noso ordenamento xurídico desde a primeira Lei de asociacións de 1887, pero que carece xa de toda xustificación. Neste mesmo sentido, modifícase o Real decreto 397/1988, do 22 de abril, polo que se regula a inscrición rexistral de asociacións xuvenís, co obxecto de suprimir a carga que para este tipo de asociacións supón a presentación por triplicado da acta fundacional e os estatutos ao solicitar a inscrición da entidade. Polo demais, mantense con carácter xeral o tipo de documentación exigible ata agora ás asociacións, por considerarse a mínima imprescindible para producir con garantías as respectivas inscricións, e engádese, para un reducido número de procedementos, a facultade do Rexistro de solicitar aos interesados un certificado de actualización de datos, cando isto resulte necesario para evitar a fragmentación da información e asegurar a coherencia da publicidade rexistral.

En concreto, practícaranse por solicitude dos interesados as inscricións de constitución de asociacións, federacións, confederacións e unións de asociacións, de transformación de asociacións, de modificación de estatutos, de xuntas directivas ou órganos de representación, de apertura e peche de delegacións ou establecementos, de incorporación e separación de asociacións a unha federación, confederación ou unión de asociacións ou da súa pertenza a entidades internacionais, de fusión e de disolución de calquera das entidades asociativas citadas, e de delegacións en España de asociacións estranxeiras.

De entre esta relación, como se indicou anteriormente, regúlase *ex novo* os procedementos de solicitude de inscrición de fusión e transformación de asociacións e para todos eles, en xeral, predetermínanse con detalle os requisitos das solicitudes e da documentación adxunta que se debe presentar no Rexistro, en garantía da maior certeza para os interesados.

É dicir, a regulación dos procedementos, nos seus aspectos xerais e específicos, realízase de forma exhaustiva para beneficiar a seguridade xurídica e para evitar que os cidadáns teñan que dirixir constantes consultas ou aclaracións ao Rexistro derivadas dunha eventual insuficiencia normativa.

Por tanto, máis detalle e menos cargas son elementos que redundan en beneficio do perseguido obxectivo de configurar uns procedementos máis claros e sinxelos.

A isto tamén vai contribuír a posta á disposición dos cidadáns de modelos de solicitude para cada procedemento de inscrición, adaptados aos novos requirimentos do regulamento, así como doutros documentos de obrigatoria achega, como actas fundacionais, estatutos ou certificados.

IV

Abórdanse outras dúas importantes cuestións referidas á actividade das asociacións, que constitúen novidades destacables.

Por unha banda, a disposición transitoria primeira da Lei orgánica 1/2002, do 22 de marzo, establece que as asociacións inscritas con anterioridade á súa entrada en vigor deberán, no prazo de dous anos, comunicar ao rexistro competente que se encontran en situación de actividade e funcionamento. Polo contrario, na actualidade consta a existencia de máis de 14.000 entidades inscritas no Rexistro Nacional de Asociacións que incumpriron tal obriga, é dicir, de asociacións que se constituíron e inscribiron conforme a Lei 191/1964, do 24 de decembro, de asociacións, e que non comunicaron estaren en funcionamento nin promoveron a inscrición de ningún acto asociativo durante, polo menos, os últimos doce anos. Por isto, para procurar a permanente correspondencia entre a realidade asociativa e a realidade rexistral, considérase pertinente, para efectos de publicidade e en garantía de terceiros, habilitar o Rexistro para tomar constancia desta situación mediante nota marxinal, que será cancelada cando tales asociacións presenten a preceptiva declaración de actividade e funcionamento.

Por outra banda, e co obxecto de realizar unha ordenación das entidades que favoreza a publicidade rexistral e a función estatística, publícanse, como anexo do regulamento, os códigos de actividades das asociacións. Dada a extensión e a complexidade dos fins que as asociacións veñen incluíndo nos seus estatutos, óptase por publicar unha listaxe de códigos para que sexan as propias asociacións as que, no momento da solicitude de inscrición, identifiquen a súa actividade principal ou máis característica. Esta facultade, non obstante, configúrase como unha opción dos interesados, polo que, na súa falta, o Rexistro procederá á clasificación da entidade. A codificación elaborouse sobre unha base decimal e, respecto do seu contido, tívose en conta o conxunto de actuacións que son máis comúns entre as asociacións e incorporáronse á listaxe algunhas descoñecidas ou menos relevantes entre o colectivo asociativo hai unha década, como as relativas á internet, redes sociais, desenvolvemento sustentable, dependencia, responsabilidade social corporativa, emprendemento ou codesenvolvemento. En todo caso, o dito código débese adaptar en cada momento á evolución social, polo que, para os efectos da súa actualización, se prevé que poida ser modificado por orde ministerial.

V

Por último, aprovéitase para modificar en determinados aspectos o Real decreto 1740/2003, do 19 de decembro, sobre procedementos relativos a asociacións de utilidade pública.

Desta forma, e co obxecto da correcta verificación dos requisitos inherentes á declaración de utilidade pública, modifícase o artigo 2 do Real decreto 1740/2003, do 19 de decembro, para recoller a obriga dos interesados de presentar unha memoria separada por cada un dos dous exercicios económicos anteriores á data de presentación da solicitude. Tamén se modifica o artigo 5 para actualizar a norma de contabilidade aplicable a este tipo de entidades, é dicir, o vixente Real decreto 1491/2011, do 24 de outubro, polo que se aproban as normas de adaptación do Plan xeral de contabilidade ás entidades sen fins lucrativos e o modelo de plan de actuación das entidades sen fins lucrativos.

Este real decreto foi sometido a informe da Axencia Española de Protección de Datos.

Na súa virtude, por proposta do ministro do Interior, coa aprobación previa do ministro de Facenda e Administracións Públicas, de acordo co Consello de Estado e logo de deliberación do Consello de Ministros na súa reunión do día 23 de outubro de 2015,

DISPONGO:

Artigo único. *Aprobación do Regulamento do Rexistro Nacional de Asociacións.*

Apróbase o Regulamento do Rexistro Nacional de Asociacións, cuxo texto se insire a seguir.

Disposición adicional primeira. *Rexistros de asociacións nas cidades de Ceuta e Melilla.*

Nas cidades de Ceuta e Melilla existirá un rexistro de asociacións, que radicará na respectiva delegación do Goberno. Tales rexistros exercerán as súas competencias respecto das asociacións que desenvolvan principalmente as súas actividades no ámbito territorial respectivo de Ceuta e Melilla.

Disposición adicional segunda. *Non incremento do gasto público.*

As medidas incluídas no Regulamento do Rexistro Nacional de Asociacións non poderán supoñer incremento de dotacións nin de retribucións nin doutros gastos de persoal.

Disposición derogatoria única. *Derrogación normativa.*

Derrógase o Real decreto 1497/2003, do 28 de novembro, polo que se aproba o Regulamento do Rexistro Nacional de Asociacións e das súas relacións cos restantes

registros de asociacións, e cantas disposicións de igual ou inferior rango se opoñan ao disposto neste real decreto e no regulamento que aproba.

Disposición derradeira primeira. *Modificación do Real decreto 1740/2003, do 19 de decembro, sobre procedementos relativos a asociacións de utilidade pública.*

Modifícase o Real decreto 1740/2003, do 19 de decembro, sobre procedementos relativos a asociacións de utilidade pública, nos seguintes termos:

Un. A alínea a) do número 2 do artigo 2 queda redactada da seguinte forma:

«a) Memorias, en que se reflectan as actividades que desenvolvese ininterrompidamente durante os dous exercicios económicos anuais precedentes a aquel en que se presenta a solicitude. Ambas as memorias, unha por cada exercicio económico, deberán estar asinadas polos membros da xunta directiva ou órgano de representación da entidade.»

Dous. O número 2 do artigo 5 queda redactado como segue:

«2. As contas anuais das entidades declaradas de utilidade pública, comprensivas do balance de situación, da conta de resultados e da memoria económica, formularanse conforme o disposto no Real decreto 1491/2011, do 24 de outubro, polo que se aproban as normas de adaptación do Plan xeral de contabilidade ás entidades sen fins lucrativos e o modelo de plan de actuación das entidades sen fins lucrativos, e as súas normas de desenvolvemento, ou na norma que o substitúa.»

Disposición derradeira segunda. *Modificación do Real decreto 397/1988, do 22 de abril, polo que se regula a inscrición rexistral de asociacións xuvenís.*

O número 1 do artigo 2 do Real decreto 397/1988, do 22 de abril, polo que se regula a inscrición rexistral de asociacións xuvenís, queda redactado da seguinte forma:

«1. Para inscribirse nos registros a que fai referencia o artigo anterior presentárase solicitude subscrita pola persoa ou persoas que actúen en nome da asociación, á cal se xuntará a acta de constitución e os estatutos, asinados en todas as súas páxinas.»

Disposición derradeira terceira. *Título competencial.*

1. De acordo coa disposición derradeira primeira da Lei orgánica 1/2002, do 22 de marzo, os artigos 9.2, 26.3, 32 e a disposición adicional quinta do Regulamento do Rexistro Nacional de Asociacións dítanse ao abeiro do artigo 149.1.1.^a da Constitución española.

2. Os restantes artigos do regulamento serán de aplicación ás asociacións de ámbito estatal.

Disposición derradeira cuarta. *Facultade de desenvolvemento.*

Facúltase o ministro do Interior para ditar as normas necesarias para o desenvolvemento e a execución do Regulamento do Rexistro Nacional de Asociacións.

En particular, poderase modificar mediante orde o anexo do regulamento.

Disposición derradeira quinta. *Entrada en vigor.*

Este real decreto entrará en vigor o 1 de decembro de 2015.

Dado en Oviedo o 23 de outubro de 2015.

FELIPE R.

O ministro do Interior,
JORGE FERNÁNDEZ DÍAZ

REGULAMENTO DO REXISTRO NACIONAL DE ASOCIACIÓNS

ÍNDICE

Título preliminar. Disposicións xerais.

- Artigo 1. Obxecto do regulamento.
- Artigo 2. O Rexistro Nacional de Asociacións.
- Artigo 3. Natureza e dependencia orgánica.
- Artigo 4. Principios de actuación.
- Artigo 5. Eficacia.
- Artigo 6. Xestión por medios electrónicos.

Título I. Organización e funcionamento do Rexistro.

Capítulo I. Organización.

- Artigo 7. Estrutura.
- Artigo 8. Contido das seccións.
- Artigo 9. Ficheiro de denominacións de asociacións.

Capítulo II. Funcionamento.

Sección 1.^a Funcións.

- Artigo 10. Funcións.
- Artigo 11. Actos inscribíbles.
- Artigo 12. Documentación que se ten que depositar.
- Artigo 13. Publicidade.
- Artigo 14. Tipos de asentos.
- Artigo 15. Forma de practicar os asentos.
- Artigo 16. Rectificación de erros.
- Artigo 17. Folla electrónica rexistral.
- Artigo 18. Constancia do domicilio e da identidade.
- Artigo 19. Follas rexistrais das seccións 1.^a, 2.^a e 3.^a
- Artigo 20. Follas rexistrais da sección 4.^a
- Artigo 21. Arquivo da documentación.

Sección 2.^a Denominacións.

- Artigo 22. Requisitos das denominacións.
- Artigo 23. Límites das denominacións.

Sección 3.^a Outras disposicións de funcionamento.

- Artigo 24. Códigos de actividades.
- Artigo 25. Xuntas directivas.
- Artigo 26. Transformación de asociacións.
- Artigo 27. Fusión de asociacións.
- Artigo 28. Disolución de asociacións.
- Artigo 29. Asociacións estranxeiras.
- Artigo 30. Contendas de orde interna.
- Artigo 31. Decisións sobre competencia.

Capítulo III. Colaboración administrativa.

- Artigo 32. Colaboración con outros rexistros de asociacións.
- Artigo 33. Colaboración con outros organismos.

Título II. Procedementos de inscrición.

Capítulo I. Normas comúns aos procedementos de inscrición iniciados por solicitude dos interesados.

- Artigo 34. Tipos de inscricións.
- Artigo 35. Presentación de solicitudes.
- Artigo 36. Requisitos das solicitudes.
- Artigo 37. Prazo de presentación.
- Artigo 38. Tramitación do procedemento.
- Artigo 39. Resolución do procedemento.
- Artigo 40. Prazo de resolución e efectos do silencio.
- Artigo 41. Recursos en vía administrativa.

Capítulo II. Procedementos de inscrición iniciados por solicitude dos interesados.

Sección 1.^a Inscrición de constitución de asociacións.

- Artigo 42. Iniciativa de inscrición.
- Artigo 43. Documentos que se deben xuntar á solicitude.

Sección 2.^a Inscrición de constitución de federacións, confederacións e unións de asociacións.

- Artigo 44. Iniciativa de inscrición.
- Artigo 45. Documentos que se deben xuntar á solicitude.

Sección 3.^a Inscrición de transformación de asociacións.

- Artigo 46. Entidades inscritas no Rexistro Nacional de Asociacións.
- Artigo 47. Asociacións autonómicas.
- Artigo 48. Asociacións especiais.

Sección 4.^a Inscrición de modificación de estatutos.

- Artigo 49. Prazo de presentación da solicitude.
- Artigo 50. Documentos que se deben xuntar á solicitude.

Sección 5.^a Inscrición da identidade dos titulares da xunta directiva ou órgano de representación.

- Artigo 51. Prazo de presentación da solicitude.
- Artigo 52. Documentos que se deben xuntar á solicitude.

Sección 6.^a Inscrición de apertura e peche de delegacións e establecementos.

- Artigo 53. Prazo de presentación da solicitude.
- Artigo 54. Documentos que se deben xuntar á solicitude.

Sección 7.^a Inscrición de incorporación e separación de asociacións a federacións, confederacións e unións, ou de calquera destas a entidades internacionais.

- Artigo 55. Iniciativa de inscrición.
- Artigo 56. Prazo de presentación da solicitude.
- Artigo 57. Requisitos da solicitude.
- Artigo 58. Documentos que se deben xuntar á solicitude.

Sección 8.^a Inscrición de fusión de asociacións.

- Artigo 59. Prazo de presentación da solicitude.
- Artigo 60. Documentos que se deben xuntar á solicitude.

Sección 9.^a Inscripción de disolución de asociacións.

Artigo 61. Prazo de presentación da solicitude.

Artigo 62. Documentos que se deben xuntar á solicitude.

Sección 10.^a Inscripción de delegacións en España de asociacións estranxeiras.

Artigo 63. Solicitude.

Artigo 64. Documentos que se deben xuntar á solicitude.

Artigo 65. Obrigas da asociación estranxeira.

Artigo 66. Lingua do procedemento.

Capítulo III. Inscripcións de oficio.

Artigo 67. Resolucións xudiciais.

Artigo 68. Utilidade pública das asociacións.

Disposición adicional primeira. Aplicación supletoria.

Disposición adicional segunda. Modelos de solicitude e de documentos.

Disposición adicional terceira. Taxas.

Disposición adicional cuarta. Denominacións.

Disposición adicional quinta. Transformación de asociacións autonómicas e especiais.

Disposición adicional sexta. Adaptación de estatutos e declaración de actividade e funcionamento.

Disposición adicional sétima. Asociacións de consumidores e usuarios.

Disposición transitoria primeira. Asociacións en proceso de inscrición e actos pendentes de inscrición de asociacións inscritas.

Disposición transitoria segunda. Clasificación de actividades.

TÍTULO PRELIMINAR

Disposicións xerais

Artigo 1. *Obxecto do regulamento.*

1. Este regulamento ten por obxecto regular o Rexistro Nacional de Asociacións, a súa estrutura e funcionamento, os procedementos de inscrición e as súas relacións con outros rexistros de asociacións e cos demais órganos da Administración, así como establecer a súa dependencia orgánica.

2. As referencias deste regulamento ás asociacións entenderanse igualmente realizadas ás federacións, confederacións e unións de asociacións, sen prexuízo das especificacións que procedan en cada caso.

Artigo 2. *O Rexistro Nacional de Asociacións.*

1. O Rexistro Nacional de Asociacións ten por obxecto a inscrición das asociacións, federacións, confederacións e unións de asociacións de ámbito estatal e de todas aquelas que non desenvolvan principalmente as súas funcións no ámbito territorial dunha única comunidade autónoma, sempre que, en ambos os casos, non teñan fin de lucro e non estean sometidas a un réxime asociativo específico.

2. Para os efectos do disposto no punto anterior, e de acordo co establecido no artigo 3.f) da Lei orgánica 1/2002, do 22 de marzo, reguladora do dereito de asociación, considéranse federacións, confederacións e unións de asociacións as entidades asociativas de segundo grao, cuxos promotores son persoas xurídicas de natureza asociativa constituídas ao abeiro da dita lei orgánica e inscritas no Rexistro Nacional de Asociacións ou nos correspondentes rexistros autonómicos de asociacións.

En concreto, considéranse federacións e unións as entidades promovidas por tres ou máis asociacións, e confederacións as entidades promovidas por un mínimo de tres federacións.

3. Así mesmo, corresponde ao Rexistro a inscrición das delegacións das asociacións estranxeiras que desenvolvan actividades en España de forma estable ou duradeira.

Artigo 3. *Natureza e dependencia orgánica.*

O Rexistro Nacional de Asociacións é un rexistro público, de carácter administrativo e único para todo o territorio do Estado.

O órgano encargado da súa xestión ten a súa sede en Madrid e depende da Secretaría Xeral Técnica do Ministerio do Interior.

Artigo 4. *Principios de actuación.*

O Rexistro queda suxeito aos seguintes principios de actuación:

- a) Legalidade: o Rexistro cualificará a legalidade das formas extrínsecas dos documentos en cuxa virtude se solicite a inscrición e a validez do seu contido.
- b) Lexitimación: o Rexistro verificará a capacidade e lexitimación das persoas que outorguen ou subscriban os documentos en cuxa virtude se solicite a inscrición.
- c) Tracto sucesivo: para inscribir actos modificativos ou extintivos doutros outorgados con anterioridade será necesaria a inscrición previa destes.
- d) Integridade: corresponde ao Rexistro o tratamento do contido dos asentos e velar por que se apliquen as medidas adecuadas para impedir a súa manipulación.
- e) Publicidade: o Rexistro fai públicos a constitución, os estatutos, os órganos de representación das asociacións e os demais actos inscribibles.

Artigo 5. *Eficacia.*

1. O contido do Rexistro presúmese exacto e válido. Os asentos producirán os seus efectos mentres non se anote a resolución xudicial ou administrativa que declare a súa inexactitude ou nulidade.

2. Os asentos practicados no Rexistro non validan os actos ou negocios xurídicos das asociacións que sexan nulos de acordo coas leis.

Artigo 6. *Xestión por medios electrónicos.*

1. O Rexistro utilizará sistemas baseados en tecnoloxías da información e das comunicacións para a xestión dos procedementos, a práctica e xestión dos asentos rexistrados e o almacenamento da información, así como nas súas relacións cos cidadáns, de acordo co disposto na lexislación reguladora do acceso electrónico dos cidadáns aos servizos públicos e na súa normativa de desenvolvemento.

2. Tales sistemas permitirán que as administracións públicas e os órganos xudiciais, no exercicio das súas competencias e baixo a súa responsabilidade, teñan acceso aos datos do Rexistro Nacional de Asociacións, aínda que, no caso das administracións públicas, respectando as excepcións relativas aos datos especialmente protexidos. Estes accesos efectuaranse mediante procedementos electrónicos e cos requisitos e prescricións técnicas que sexan establecidos dentro dos esquemas nacionais de interoperabilidade e de seguridade.

3. O dimensionamento, a provisión, a administración e o mantemento dos ditos sistemas, que aseguren o seu funcionamento conforme a normativa vixente sobre seguridade da información e interoperabilidade, así como a de accesibilidade universal e deseño para todas as persoas, será competencia do órgano que teña asignadas tales atribucións dentro do departamento.

TÍTULO I

Organización e funcionamento do Rexistro

CAPÍTULO I

Organización

Artigo 7. *Estrutura.*

O Rexistro estrutúrase nas seguintes seccións:

Sección 1.^a Asociacións.

Sección 2.^a Federacións, confederacións e unións de asociacións.

Sección 3.^a Asociacións xuvenís.

Sección 4.^a Delegacións en España de asociacións estranxeiras.

Artigo 8. *Contido das seccións.*

As seccións 1.^a, 2.^a e 3.^a teñen por obxecto agrupar e ordenar as asociacións, federacións, confederacións e unións de asociacións de ámbito estatal, e de todas aquelas que non desenvolvan principalmente as súas funcións no ámbito territorial dunha única comunidade autónoma, así como as asociacións xuvenís de igual ámbito de actuación.

A finalidade da sección 4.^a é a de agrupar e ordenar as asociacións estranxeiras con delegación en España.

Artigo 9. *Ficheiro de denominacións de asociacións.*

1 O Rexistro levará un ficheiro de denominacións de asociacións, que se poñerá á disposición dos cidadáns para ofrecer publicidade informativa sobre os nomes de entidades asociativas previamente inscritas.

2. O contido do ficheiro estará integrado polos nomes das asociacións inscritas no Rexistro Nacional de Asociacións e polos das asociacións inscritas nos rexistros autonómicos e especiais, sempre que a dita inscrición fose comunicada polo respectivo órgano competente.

Para estes efectos, e co obxecto de manter actualizado o ficheiro de denominacións, o Rexistro recibirá a información que os rexistros autonómicos e especiais lle proporcionen sobre inscrición, modificación da denominación, disolución e baixa das entidades asociativas da súa competencia.

O envío da información por parte dos rexistros autonómicos e especiais de asociacións realizarase exclusivamente por procedementos e en soportes electrónicos, axustados aos requisitos que estableza a Secretaría Xeral Técnica en coordinación cos demais órganos competentes e coas unidades técnicas que proporcionan soporte telemático a tales órganos.

3. O ficheiro será accesible a través da sede electrónica central do Ministerio do Interior.

4. A baixa definitiva por disolución da entidade, practicada polo rexistro correspondente, comportará a supresión da súa denominación no ficheiro.

CAPÍTULO II

Funcionamento

Sección 1.^a FunciónsArtigo 10. *Funcións.*

Son funcións do Rexistro:

- a) Inscribir os actos que deban acceder ao Rexistro.
- b) Depositar a documentación preceptiva.
- c) Dar publicidade aos asentos e aos documentos depositados.

Artigo 11. *Actos inscribíbles.*

1. Inscribíranse no Rexistro:

- a) A denominación.
- b) Os fins e as actividades estatutarias.
- c) O domicilio.
- d) O ámbito territorial de actuación.
- e) A identidade dos titulares da xunta directiva ou do órgano de representación.
- f) A data de constitución e a de inscrición.
- g) A apertura e o peche de delegacións ou establecementos da entidade.
- h) A declaración e revogación da condición de utilidade pública.
- i) As entidades que constitúen ou integran federacións, confederacións ou unións.
- j) A pertenza a federacións, confederacións e unións ou entidades internacionais.
- k) A baixa, suspensión ou disolución da asociación, e as súas causas.

2. Igualmente, inscribíranse as modificacións que afecten os estatutos, nos termos a que se refire o artigo 16 da Lei orgánica 1/2002, do 22 de marzo.

3. Poderá ser obxecto de inscrición o número de identificación fiscal das asociacións que deban obtelo de acordo coa normativa tributaria, e así o comuniquen ao Rexistro con motivo da primeira inscrición da entidade ou en calquera momento posterior.

Artigo 12. *Documentación que se ten que depositar.*

1. Estará depositada no Rexistro a seguinte documentación presentada polos interesados:

- a) A acta fundacional.
- b) A acta en que consten os acordos modificativos dos datos rexistrais ou se introduzan novos datos.
- c) Os estatutos e as súas modificacións.
- d) A relativa á apertura, traslado ou clausura de delegacións ou establecementos.
- e) A referente á incorporación ou baixa de asociacións en federacións, confederacións e unións, ou en entidades internacionais.
- f) A referida á disolución da entidade e, se é o caso, ao destino dado ao patrimonio remanente.

2. Cando se trate de asociacións estranxeiras que actúen de forma estable en España, estará depositada a seguinte documentación, presentada pola propia entidade traducida para o castelán:

- a) Acta da reunión do órgano competente, asinada polas persoas que teñan a representación da asociación, en que se recolla o acordo de apertura da delegación en España, con indicación do domicilio principal da dita delegación.

b) A documentación xustificativa de que se encontra validamente constituída a asociación estranxeira conforme a súa lei persoal, consistente no certificado acreditativo da inscrición, aprobación, legalización ou recoñecemento, expedido pola autoridade competente do país de orixe.

c) Os estatutos ou documento análogo que regule a organización e o funcionamento da asociación.

d) A documentación en que conste a identidade dos representantes en España, sexan persoas físicas ou xurídicas, e a xustificativa das súas facultades de representación.

3. Tamén estarán depositadas no Rexistro:

a) As resolucións xudiciais que afecten actos susceptibles de constancia rexistral.

b) As resolucións polas cales se acorden a declaración e a revogación de utilidade pública das asociacións.

Artigo 13. *Publicidade.*

1. O Rexistro fará efectiva a publicidade mediante certificado do contido dos asentos, nota simple informativa, copia dos asentos ou dos documentos depositados e a través de listaxes.

Igualmente, poderase facer efectiva mediante a exhibición dos asentos e dos documentos, logo de comparecencia dos interesados na sede do Rexistro.

2. O Rexistro velará polo cumprimento da Lei orgánica 15/1999, do 13 de decembro, de protección de datos de carácter persoal, respecto das solicitudes que afecten os datos persoais citados nos asentos ou nos documentos, incluídas as resolucións xudiciais que, se é o caso, consten nos expedientes.

3. Os certificados, que se poden emitir en formato electrónico, son o único medio de acreditar fidedignamente o contido dos asentos e dos documentos depositados. En ningún caso o Rexistro expedirá certificacións sobre datos correspondentes a entidades inscritas noutros rexistros de asociacións.

4. A nota simple informativa ou copia dos asentos constituirá un simple traslado dos datos rexistrais.

5. O Rexistro poderá facilitar información sobre as asociacións mediante a emisión de listaxes. Para estes efectos, o interesado deberá concretar os criterios de busca e non se admitirán as solicitudes xenéricas ou que pretendan envorcar todos os datos do Rexistro.

Nas listaxes farase constar a denominación das asociacións, o seu número nacional de inscrición e o domicilio social.

6. A exhibición dos asentos e dos documentos depositados exixirá a solicitude previa do interesado, presentada con antelación suficiente á comparecencia, e realizarase sempre en presenza do persoal competente.

7. O Rexistro velará polo cumprimento das normas vixentes respecto das solicitudes de publicidade en masa.

Artigo 14. *Tipos de asentos.*

1. O Rexistro poderá practicar os seguintes asentos:

a) Inscricións.

b) Notas marxinais.

c) Anotacións provisionais.

d) Cancelacións.

2. Mediante a inscrición rexístranse os actos a que se refire o artigo 11, así como as súas actualizacións ou modificacións.

3. A nota marxinal dará razón daqueles actos de relevancia rexistral, distintos dos anteriores, producidos durante a vida da asociación.

4. A anotación provisional practicarase para reflectir o carácter transitorio de calquera inscrición.

5. A cancelación produce a supresión definitiva de calquera dos asentos anteriores.

Artigo 15. *Forma de practicar os asentos.*

1. Os asentos redactaranse en lingua castelá de forma breve e remitiranse ao expediente onde conste o documento que formalice o acto obxecto de inscrición.

2. En todo caso, quedará constancia da data en que se practica o asento.

Artigo 16. *Rectificación de erros.*

Os erros materiais, de feito ou aritméticos que se detecten no contido dos asentos serán rectificadas, de oficio ou por instancia dos interesados, polo propio Rexistro.

Artigo 17. *Folla electrónica rexistral.*

1. O Rexistro practicará os asentos en follas rexistrais, que se elaborarán exclusivamente en soporte electrónico e conterán os campos necesarios para realizar calquera tipo de asento.

2. As follas rexistrais das seccións 1.^a, 2.^a, 3.^a e 4.^a conterán un número único, denominado «número nacional de inscrición», que se asignará de forma correlativa e identificará cada entidade asociativa dentro das respectivas seccións. Así mesmo, incorporarán o número de expediente onde se archiva a súa documentación.

Artigo 18. *Constancia do domicilio e da identidade.*

1. A constancia do domicilio para efectos rexistrais expresará a rúa e o número ou, na súa falta, o lugar de situación, e a localidade, o municipio, a provincia e o código postal.

2. Cando a asociación sinale como domicilio social o dunha institución ou entidade pública ou privada, o Rexistro requirirá daquela documento acreditativo da conformidade con tal sinalamento por parte da dita institución ou entidade.

3. Para a constancia da identidade dunha persoa física, indicárase:

- a) O nome e os apelidos.
- b) A nacionalidade.
- c) O domicilio.
- d) O número do documento legal de identificación.

4. Son documentos de identidade admitidos o DNI, o NIE e o pasaporte en vigor, así como calquera outro acreditativo da identidade validamente emitido polo país de orixe do promotor.

5. Para a identificación das persoas xurídicas indicárase:

- a) A razón social ou denominación.
- b) A nacionalidade.
- c) O domicilio social.
- d) O número de identificación fiscal, cando o deban obter de acordo coa normativa tributaria.

Artigo 19. *Follas rexistrais das seccións 1.^a, 2.^a e 3.^a*

As follas rexistrais das seccións 1.^a, 2.^a e 3.^a conterán os seguintes datos da entidade asociativa:

- a) A denominación
- b) O número de identificación fiscal, se é o caso.
- c) Os fins e as actividades estatutarias en forma codificada.

- d) O domicilio.
- e) O ámbito territorial de actuación.
- f) A identidade do presidente ou representante legal e do secretario ou persoa con facultade para certificar acordos sociais, e a razón social ou denominación cando sexan persoas xurídicas.
- g) A data de constitución e a de inscrición.
- h) A apertura e o peche de delegacións ou establecementos, con indicación do domicilio.
- i) A declaración e revogación da condición de utilidade pública e a data da súa publicación no «Boletín Oficial del Estado».
- j) A pertenza a federacións, confederacións e unións de asociacións, así como a entidades internacionais.
- k) En caso de federacións, confederacións e unións, as entidades que a integran.
- l) Os acordos de transformación e fusión.
- m) As resolucións xudiciais que afecten actos susceptibles de constancia rexistral.
- n) A baixa e as súas causas.
- ñ) A suspensión ou disolución e as súas causas, con indicación da autoridade xudicial cando esta a acordase, e o nomeamento de liquidadores, se é o caso.
- o) O peche provisional ou definitivo da folla, a data e a súa causa.

Artigo 20. *Follas rexistradas da sección 4.ª*

As follas rexistradas da sección 4.ª conterán os seguintes datos das asociacións estranxeiras validamente constituídas conforme a súa lei persoal e a Lei orgánica 1/2002, do 22 de marzo:

- a) A denominación e a nacionalidade.
- b) O número de identificación fiscal, se é o caso.
- c) Os fins e as actividades estatutarias en forma codificada.
- d) O domicilio principal da delegación en España.
- e) O ámbito territorial de actuación.
- f) A data do acordo de apertura da delegación en España e a data de inscrición no Rexistro Nacional de Asociacións.
- g) A identidade do representante en España e a razón social ou denominación cando este sexa persoa xurídica.
- h) A apertura e o peche doutras delegacións ou establecementos, con indicación do domicilio.
- i) As resolucións xudiciais que afecten actos susceptibles de constancia rexistral.
- j) O cesamento das actividades da asociación en España.
- k) A suspensión ou disolución da asociación estranxeira.
- l) O peche provisional ou definitivo da folla, a data e a súa causa.

Artigo 21. *Arquivo da documentación.*

1. O Rexistro levará un expediente por cada unha das entidades asociativas das seccións 1.ª, 2.ª, 3.ª e 4.ª, onde quedará depositada a documentación a que se refire o artigo 12.

2. O Rexistro, con independencia do formato da documentación que presenten os interesados, conservará copia electrónica dela nas condicións de seguridade e interoperabilidade que establece a normativa vixente.

Sección 2.ª Denominacións

Artigo 22. *Requisitos das denominacións.*

1. As asociacións só poderán ter unha denominación. As siglas ou nomes abreviados que se engadan formarán parte da denominación única.

2. A denominación poderá ser en castelán ou nalgunha das linguas oficiais das comunidades autónomas. Tamén poderá ser en calquera idioma estranxeiro.

En todo caso, a denominación estará formada por letras do alfabeto latino e, de incluír cifras, estas só se poderán expresar en números arábigos ou romanos.

O Rexistro, cando o xulgue necesario, poderá requirir da asociación un certificado de tradución para o castelán da denominación.

3. En caso de fusión, a asociación absorbente ou a nova asociación resultante da fusión poderán adoptar como denominación a de calquera das que se extingan por virtude da fusión, quedando sen efectos as restantes denominacións.

Artigo 23. *Límites das denominacións.*

1. O Rexistro non inscribirá a denominación das asociacións cando:

a) Inclúa expresións contrarias ás leis ou poida supoñer vulneración dos dereitos fundamentais.

b) Estea formada exclusivamente co nome de España, cos das súas comunidades autónomas, provincias, municipios, illas e demais entidades locais, co nome dos órganos das administracións públicas, ou cos dos Estados estranxeiros ou organizacións internacionais.

c) Incorpore termos dotados de valor institucional como «estatal», «oficial», «público», «real» ou calquera outro que induza a confusión sobre a natureza xurídico-privada da entidade, salvo que esta conte coa correspondente autorización.

d) Inclúa termos ou expresións que induza a erro ou confusión sobre a súa propia identidade, ou sobre a clase ou natureza desta, en especial, mediante a adopción de palabras, conceptos ou símbolos, acrónimos e similares propios de persoas xurídicas diferentes, sexan ou non de natureza asociativa.

2. Tampouco será obxecto de inscrición a denominación cando esta coincida ou se asemelle de maneira que poida crear confusión:

a) Coa de entidades preexistentes, sexan ou non de nacionalidade española, salvo que, logo de autorización destas, se constitúan como filiais ou delegacións e introduzan algún patronímico que as distinga.

b) Coa de ningunha outra asociación previamente inscrita no Rexistro ou que se encontre incorporada ao ficheiro de denominacións de asociacións.

c) Cos nomes ou pseudónimos das persoas físicas, salvo consentimento expreso delas ou dos seus sucesores. Presúmese prestado o consentimento cando a persoa cuxo nome ou pseudónimo figure na denominación sexa socia fundadora da asociación.

d) Cunha marca rexistrada notoria, salvo que a inscrición a solicite o seu titular ou conste o seu consentimento.

3. Enténdese que existe identidade non só no caso de plena coincidencia na denominación, senón tamén cando conorra algún dos seguintes supostos:

a) A utilización das mesmas palabras en distinta orde, xénero ou número.

b) A utilización das mesmas palabras coa adición ou supresión de termos, artigos, preposicións, conxuncións, guións, signos de puntuación e demais expresións ou partículas de escaso significado.

c) A utilización de palabras distintas pero con notoria semellanza fonética.

4. Para os efectos do disposto nos puntos anteriores, o Rexistro poderá requirir a colaboración do Rexistro Mercantil Central e do Rexistro de Marcas.

5. Por corresponder a un ámbito diferente e inducir a erro, o Rexistro non inscribirá as denominacións que inclúan os dominios da internet, tales como «.es», «.com», «.net» ou «.org».

6. Os termos «federación», «confederación» e «unión de asociacións» quedan reservados ás entidades asociativas de segundo grao definidas no artigo 2.2.

7. A expresión «asociación xuvenil» queda reservada a aquelas sometidas ao Real decreto 397/1988, do 22 de abril, polo que se regula a inscrición rexistral de asociacións xuvenís.

8. Cando a denominación elixida polos promotores ou socios non se axuste aos requisitos e límites establecidos, o Rexistro abrirá o trámite de emenda a que se refire o artigo 38.2.

Sección 3.^a Outras disposicións de funcionamento

Artigo 24. Códigos de actividades.

1. Para os efectos de anotar os fins e as actividades da asociación en forma codificada, os interesados poderán indicar nas solicitudes de inscrición o código, cun mínimo de tres díxitos, que se corresponda coa actividade máis característica da asociación, de acordo cos aprobados no anexo deste regulamento. Cando non se identifique ningún código idóneo, poderase sinalar o código «103.–Outras».

2. O Rexistro anotará na correspondente folla rexistral o código seleccionado pola asociación. Na falta de indicación expresa polos interesados, a clasificación realizaráa o propio Rexistro.

3. O disposto neste artigo só será aplicable ás solicitudes de inscrición de constitución, transformación ou fusión de asociacións, de delegacións en España de asociacións estranxeiras e de modificación de estatutos, se neste último caso se produce unha alteración substancial dos fins da entidade.

Artigo 25. Xuntas directivas.

Sen prexuízo da solicitude de inscrición da totalidade dos membros da xunta directiva ou órgano de representación, que se deberá presentar tras o correspondente proceso de elección ou nomeamento, a entidade deberá comunicar ao Rexistro calquera incidencia que altere a composición do dito órgano representativo, e instará a súa inscrición.

Artigo 26. Transformación de asociacións.

1. Para os efectos deste regulamento enténdese por transformación a operación consistente no cambio do ámbito territorial de actuación da asociación ou na modificación do seu réxime xurídico. Para a súa adecuada constancia rexistral, os interesados promoverán o correspondente procedemento de inscrición de transformación de asociacións regulado na sección 3.^a do capítulo II do título II.

2. Cando se trate de asociacións inscritas no Rexistro Nacional de Asociacións, a transformación dará lugar á práctica dun asentamento de inscrición de baixa provisional. Ao mesmo tempo, o Rexistro remitirá a folla rexistral e a copia do expediente ao rexistro autonómico ou especial que corresponda. Cando se teña constancia da inscrición de alta no rexistro competente, o Rexistro inscribirá a baixa definitiva da asociación transformada.

3. Cando se trate de asociacións inscritas nos rexistros autonómicos e especiais de asociacións, o Rexistro Nacional de Asociacións requirirá do órgano competente o envío da información necesaria para a tramitación do correspondente procedemento de inscrición de alta.

Artigo 27. Fusión de asociacións.

1. As asociacións inscritas no Rexistro Nacional de Asociacións poderanse fusionar, xa sexa mediante a constitución dunha nova por dúas ou máis, ou mediante a absorción dunha ou varias por outra xa existente.

2. A fusión dará lugar á práctica dun asentamento de inscrición que expresará:

a) Se se trata da creación dunha nova asociación, os mesmos datos que os previstos para a constitución de asociacións e, ademais, a data do acordo de fusión.

b) Se se trata dun suposto de absorción, farase constar na folla rexistral da asociación absorbente a data do acordo de fusión.

3. En todo caso, o Rexistro procederá a cancelar os asentos e ao peche definitivo das follas rexistrais correspondentes ás asociacións que se extingan.

Artigo 28. *Disolución de asociacións.*

1. A disolución das asociacións abre o período de liquidación, ata o fin do cal a entidade conservará a súa personalidade xurídica e permanecerá inscrita no Rexistro.

2. A disolución dará lugar á práctica dun asento de inscrición de baixa provisional.

Unha vez concluídas as operacións a que se refire o artigo 18.3 da Lei orgánica 1/2002, do 22 de marzo, os liquidadores presentarán solicitude de cancelación de todos os asentos da asociación, e o Rexistro procederá ao peche definitivo da folla rexistral.

3. Se no momento da disolución a entidade carece de patrimonio, o Rexistro procederá directamente a cancelar todos os asentos da asociación e ao peche definitivo da folla rexistral.

Artigo 29. *Asociacións estranxeiras.*

O Rexistro procederá ao peche definitivo da folla rexistral das delegacións das asociacións estranxeiras cando estas comuniquen o cesamento das súas actividades en España ou cando remitan a documentación a que fai referencia o artigo 28.3 da Lei orgánica 1/2002, do 22 de marzo, relativa á disolución da asociación.

Artigo 30. *Contendas de orde interna.*

1. O Rexistro non tramitará aqueles escritos polos cales os asociados comuniquen a existencia de discrepancias de orde interna, a menos que vaian acompañados da seguinte documentación:

- a) Copia da demanda presentada ante o xulgado ou tribunal competente.
- b) Testemuño da resolución xudicial de admisión da demanda.

2. Se o contido da demanda se refire a actos asociativos xa inscritos, practicarase unha anotación provisional para reflectir o carácter transitorio da inscrición.

Se se refire a actos non inscritos, tomarase razón da demanda mediante nota marxinal. Este mesmo tipo de asento practicarase respecto das posteriores solicitudes de inscrición que se presenten en relación con tales actos asociativos.

3. En todo caso, o Rexistro practicará os asentos de inscrición ou cancelación que resulten da correspondente resolución xudicial firme.

Artigo 31. *Decisións sobre competencia.*

De acordo co disposto no artigo 2.1, o Rexistro remitirá ao órgano competente as solicitudes de inscrición que reciba das seguintes asociacións:

a) Aquelas cuxo ámbito principal de actuación non supere o territorio dunha comunidade autónoma.

b) As sometidas a un réxime asociativo específico, cuxa inscrición ou depósito de estatutos nun rexistro especial sexa obrigatorio, a menos que unha norma estatal con rango de lei estableza a súa inscrición previa no Rexistro Nacional de Asociacións.

CAPÍTULO III

Colaboración administrativa

Artigo 32. *Colaboración con outros rexistros de asociacións.*

1. O Rexistro comunicará aos rexistros autonómicos a apertura de delegacións ou establecementos dentro do seu territorio por asociacións de ámbito estatal ou estranxeiras inscritas nel.

2. O Rexistro facilitará aos rexistros autonómicos e especiais a información que lle soliciten para o exercicio das súas respectivas funcións rexistrais.

Artigo 33. *Colaboración con outros organismos.*

1. O Rexistro facilitará a información que lle sexa solicitada por outros rexistros ou organismos das administracións públicas, sempre que resulte necesaria para o exercicio das súas competencias e se refira a datos de contido rexistral de asociacións concretas. A información cederase preferentemente por medios electrónicos. O Ministerio do Interior dará resposta ás peticións de información máis frecuentes realizadas polos diferentes órganos e entidades públicas a través da plataforma de intermediación de datos das administracións públicas.

2. En todo caso, o Rexistro Nacional de Asociacións facilitará a información rexistral que lle sexa requirida polos xulgados e tribunais.

TÍTULO II

Procedementos de inscrición

CAPÍTULO I

Normas comúns aos procedementos de inscrición iniciados por solicitude dos interesados

Artigo 34. *Tipos de inscricións.*

1. O Rexistro practicará as inscricións por solicitude de persoa interesada ou de oficio.

2. Practicaranse por solicitude dos interesados as inscricións de:

- a) Constitución de asociacións.
- b) Constitución de federacións, confederacións e unións de asociacións.
- c) Transformación de asociacións.
- d) Modificación de estatutos.
- e) Identidade dos titulares da xunta directiva ou órgano de representación.
- f) Apertura e peche de delegacións e establecementos.
- g) Incorporación e separación de asociacións a federacións, confederacións e unións, ou de calquera destas a entidades internacionais.
- h) Fusión de asociacións.
- i) Disolución de asociacións.
- j) Delegacións en España de asociacións estranxeiras.

3. Practicaranse de oficio as seguintes inscricións:

- a) As ordenadas por resolución xudicial firme.
- b) As relativas á declaración e revogación da utilidade pública das asociacións de ámbito estatal.

Artigo 35. *Presentación de solicitudes.*

1. As solicitudes de inscrición poderanse presentar nos lugares previstos pola lexislación reguladora do procedemento administrativo común das administracións públicas.

2. A documentación que, se é o caso, se deba presentar xunto coa solicitude poderá ser orixinal ou achegarse mediante certificado expedido polo secretario ou persoa facultada para isto conforme os estatutos.

Artigo 36. *Requisitos das solicitudes.*

1. O contido das solicitudes de inscrición axustarase ao disposto na lexislación reguladora do procedemento administrativo común das administracións públicas, e a elas xuntaranse os documentos que en cada caso resulten preceptivos conforme o disposto no capítulo II deste título.

2. En todo caso, indicarán os seguintes datos:

- a) Denominación exacta da asociación e o seu domicilio.
- b) Número de inscrición, cando se trate de asociacións xa inscritas.
- c) Descrición da documentación que se presenta coa solicitude.

3. Nos termos do artigo 24, os interesados poderán indicar na solicitude o código que se corresponda coa actividade máis característica da asociación.

4. Nos supostos de fusión teranse en conta as seguintes regras:

a) No caso de fusión de dúas ou máis asociacións, a solicitude presentarase asinada por calquera dos representantes das asociacións afectadas, e nela expresaranse a denominación e os números de inscrición de cada unha delas, así como a denominación exacta da nova entidade asociativa.

b) No caso de fusión por absorción, a solicitude presentarase asinada polo representante da asociación absorbente, e nela expresaranse a denominación e os números de inscrición das asociacións afectadas.

5. Respecto do procedemento de inscrición de incorporación e separación de asociacións a federacións, confederacións ou unións de asociacións, ou de calquera destas a entidades internacionais, observaranse os requisitos específicos da sección 7.^a do capítulo II.

Artigo 37. *Prazo de presentación.*

1. Para as asociacións xa inscritas, o prazo de presentación das solicitudes de inscrición de modificación ou actualización dos datos rexistrados será dun mes, contado desde a data que se indica no capítulo II para cada procedemento.

2. Cando as solicitudes se presenten fóra de prazo, poderáselles requirir aos interesados a presentación dun certificado en que se ratifique a vixencia da variación producida nos datos.

Artigo 38. *Tramitación do procedemento.*

1. O Rexistro examinará as solicitudes e a documentación preceptiva adxunta, e verificará se se cumpren os requisitos previstos na Lei orgánica 1/2002, do 22 de marzo, e neste regulamento.

2. Se as solicitudes non reúnen os requisitos previstos no artigo 36, ou a denominación non se axusta ao establecido nos artigos 22 e 23, requirirase o interesado para que, nun prazo de dez días, emende a falta, ou presente ou rectifique a documentación obrigatoria, con expresa indicación de que, se así non o fixer, se considerará desistido da súa petición, logo de resolución ditada para o efecto.

3. Nos procedementos de inscrición de constitución de asociacións, transformación de asociacións, de apertura de delegacións en España de asociacións estranxeiras e de modificación de estatutos, o instrutor do expediente poderá solicitar aqueles informes que considere necesarios por razón da denominación, fins sociais, actividades ou outros contidos estatutarios.

O órgano informante deberase pronunciar sobre se, desde o ámbito das súas competencias, concorre algún motivo que impida acceder á inscrición. En particular, sobre se as actividades da asociación coliden co exercicio de funcións públicas de carácter administrativo.

4. Unha vez instruído o procedemento, practicarase o trámite de audiencia, salvo que non figuren no expediente nin sexan tidos en conta outros feitos nin outras alegacións ou probas que as aducidas ou achegadas polos interesados.

Artigo 39. *Resolución do procedemento.*

1. O titular da Secretaría Xeral Técnica ditará resolución motivada en que acorde ou denegue a inscrición.

2. A resolución que acorde a inscrición será expresiva do acto susceptible de acceder ao Rexistro e indicará expresamente que esta se practica para os únicos efectos de publicidade e que non exonera os interesados de cumprir a normativa vixente reguladora das actividades necesarias para o desenvolvemento dos fins estatutarios.

3. Poderase denegar a inscrición solicitada cando concorra algún dos seguintes supostos:

a) Que a asociación, de ámbito estatal e réxime común, non reúna os requisitos xerais establecidos na Lei orgánica 1/2002, do 22 de marzo, e neste regulamento.

b) Que a entidade non estea incluída no ámbito de aplicación da Lei orgánica 1/2002, do 22 de marzo, ou non teña natureza xurídica de asociación.

4. A resolución que se dite notificaráselles aos interesados e irá acompañada, de ser o caso, da correspondente documentación debidamente dilixenciada polo Rexistro.

Artigo 40. *Prazo de resolución e efectos do silencio.*

1. O prazo de resolución dos procedementos de inscrición será de tres meses contados desde a data de entrada da solicitude no Ministerio do Interior.

2. Transcorrido este prazo sen se ter ditado resolución expresa, o interesado poderá entender estimada a solicitude.

3. De acordo co disposto nos números 2 e 4 do artigo 30 da Lei orgánica 1/2002, do 22 de marzo, o prazo quedará suspendido:

a) Desde a data da correspondente notificación, cando se lle deba requirir ao interesado a emenda de defectos a que se refire o artigo 38.2.

b) Desde a data da resolución motivada de remisión das actuacións ao Ministerio Fiscal ou ao órgano xurisdiccional competente, cando se encontren indicios racionais de ilicitude penal na documentación que xunte ás solicitudes de inscrición de constitución de asociacións, de transformación de asociacións, de delegacións en España de asociacións estranxeiras e de modificación de estatutos.

Artigo 41. *Recursos en vía administrativa.*

As resolucións dos procedementos de inscrición non poñen fin á vía administrativa e contra elas poderase interpoñer recurso de alzada ante o subsecretario do Interior.

CAPÍTULO II

Procedementos de inscrición iniciados por solicitude dos interesados

Sección 1.ª Inscrición de constitución de asociacións

Artigo 42. *Iniciativa de inscrición.*

A solicitude de inscrición da constitución da asociación deberá ser presentada, polo menos, por un dos seus promotores.

Artigo 43. *Documentos que se deben xuntar á solicitude.*

1. Á solicitude deberán selle xuntar a acta fundacional, os estatutos e a copia dos documentos de identidade dos promotores ou dos seus representantes. Non será necesario xuntar esta última documentación cando na propia solicitude se autorice o Rexistro para comprobar os datos de identidade dos ditos promotores ou representantes.

2. A acta fundacional deberá conter:

a) A identidade dos promotores se son persoas físicas e a denominación ou razón social se son persoas xurídicas e, en ambos os dous casos, a nacionalidade e o domicilio. Así mesmo, a identidade, a nacionalidade e o domicilio das persoas que actúen en representación dos promotores.

b) A vontade dos promotores de constituír unha asociación, os pactos que, se é o caso, establececen, e a denominación exacta daquela.

c) Os estatutos aprobados que rexerán a organización e o funcionamento da asociación.

d) A designación dos integrantes dos órganos de representación.

e) O lugar e a data de outorgamento da acta, asinada polos promotores.

A acta deberá ir acompañada, para o caso de persoas xurídicas, dun certificado do acordo adoptado polo órgano competente, en que conste a vontade de constituír a asociación ou formar parte dela, e a designación da persoa física que a representa, que deberá acreditar a súa identidade.

3. Os estatutos deberán conter todos os aspectos establecidos no artigo 7.1 da Lei orgánica 1/2002, do 22 de marzo, sen prexuízo de que tamén poidan incluír calquera outro contido que os promotores consideren conveniente, sempre que non se opoñan ás leis nin contradigan os principios configuradores do dereito de asociación. Os estatutos deberán estar asinados por todos os promotores.

Sección 2.ª Inscrición de constitución de federacións, confederacións e unións de asociacións

Artigo 44. *Iniciativa de inscrición.*

A solicitude de inscrición da constitución de federacións, confederacións e unións de asociacións deberá ser presentada, polo menos, por unha das entidades promotoras.

Artigo 45. *Documentos que se deben xuntar á solicitude.*

A documentación que se debe xuntar á solicitude suxeitarase ao establecido na sección 1.ª deste capítulo, coas seguintes particularidades:

a) Na acta fundacional deberán constar a denominación, o número de inscrición e o domicilio de cada unha das entidades asociativas promotoras, así como os datos de identidade dos seus representantes.

b) Por cada unha das entidades que formen a federación, confederación ou unión achegarse o acordo adoptado para a súa integración e a designación da persoa que as represente no acto constitutivo.

c) Os estatutos deberán estar asinados polos representantes de todas as entidades promotoras.

Sección 3.^a Inscripción de transformación de asociacións

Artigo 46. Entidades inscritas no Rexistro Nacional de Asociacións.

1. As entidades inscritas no Rexistro Nacional de Asociacións solicitarán a súa baixa nel por redución do ámbito territorial de actuación ou por cambio de réxime xurídico, no prazo previsto no artigo 37.1, contado desde a adopción do respectivo acordo de modificación de estatutos.

2. Á solicitude deberase xuntar:

a) Acta da asemblea xeral en que conste que a asociación reduce o seu ámbito territorial de actuación ao dunha soa comunidade autónoma ou que deixa de se rexer polo réxime xeral e común da Lei orgánica 1/2002, do 22 de marzo, para acollerse a un réxime xurídico especial, e a data da súa aprobación. Igualmente, fará constar que a transformación se aprobou conforme os requisitos que para a adopción de acordos establecen os estatutos.

b) Texto íntegro dos novos estatutos, que conteña os artigos modificados, asinado polo presidente e secretario da asociación, e no cal se faga constar, mediante dilixencia expedida ao final do documento, que quedaron redactados coa inclusión das modificacións acordadas na asemblea xeral, e que indique a data en que se adoptou a modificación.

Artigo 47. Asociacións autonómicas.

1. As entidades inscritas nos correspondentes rexistros autonómicos de asociacións poderán solicitar a súa inscrición no Rexistro Nacional de Asociacións logo de acordo de modificación de estatutos para ampliar o seu ámbito territorial de actuación e este supere o dunha soa comunidade autónoma.

2. A solicitude deberase presentar no prazo previsto no artigo 37.1, contado desde a adopción do respectivo acordo de modificación de estatutos.

3. Á solicitude deberase xuntar:

a) Acta da asemblea xeral en que conste o acordo de modificación de estatutos, expresivo do ámbito de actuación, que debe superar o territorio dunha comunidade autónoma. Igualmente, indicará a relación de artigos modificados e a data da súa aprobación, e que a modificación se aprobou conforme os requisitos que para a adopción de acordos establecen os estatutos.

b) Texto íntegro dos novos estatutos, que conteña os artigos modificados, asinado polo presidente e secretario da asociación, e no cal se faga constar, mediante dilixencia expedida ao final do documento, que quedaron redactados coa inclusión das modificacións acordadas na asemblea xeral, e que indique a data en que se adoptou a modificación.

c) Certificado en que conste a relación actualizada da composición da xunta directiva ou órgano de representación, con indicación da identidade dos seus titulares se son persoas físicas e da denominación ou razón social en caso de persoas xurídicas, os cargos que teñen e a data da súa elección ou nomeamento, a nacionalidade e o domicilio de cada un deles.

Artigo 48. Asociacións especiais.

1. As entidades inscritas nos correspondentes rexistros especiais de asociacións poderán solicitar a súa inscrición no Rexistro Nacional de Asociacións logo de acordo de

modificación de estatutos para cambiar o seu réxime xurídico e acollerse exclusivamente ao réxime xeral e común da Lei orgánica 1/2002, do 22 de marzo.

2. A solicitude deberase presentar no prazo previsto no artigo 37.1, contado desde a adopción do respectivo acordo de modificación de estatutos.

3. Á solicitude deberase xuntar:

a) Acta da asemblea xeral na cal conste o acordo de modificación de estatutos, expresivo do réxime xurídico, que se debe referir ao sometemento da entidade á Lei orgánica 1/2002, do 22 de marzo. Igualmente, indicará a relación de artigos modificados e a data da súa aprobación, e que a modificación se aprobou conforme os requisitos que para a adopción de acordos establecen os estatutos.

b) Texto íntegro dos novos estatutos, que conteña os artigos modificados, asinado polo presidente e polo secretario da asociación, e no cal se faga constar, mediante dilixencia expedida ao final do documento, que quedaron redactados coa inclusión das modificacións acordadas na asemblea xeral, e que indique a data en que se adoptou a modificación.

c) Certificado en que conste a relación actualizada da composición da xunta directiva ou órgano de representación, con indicación da identidade dos seus titulares se son persoas físicas e da denominación ou razón social en caso de persoas xurídicas, os cargos que teñen e a data da súa elección ou nomeamento, a nacionalidade e o domicilio de cada un deles.

Sección 4.^a Inscripción de modificación de estatutos

Artigo 49. Prazo de presentación da solicitude.

A solicitude deberase presentar no prazo previsto no artigo 37.1, contado desde a adopción do respectivo acordo de modificación de estatutos.

Artigo 50. Documentos que se deben xuntar á solicitude.

Á solicitude de inscrición de modificación de estatutos deberanse xuntar os seguintes documentos:

a) Acta da asemblea xeral, que recolla o acordo de modificación de estatutos, a relación de artigos modificados e a data da súa aprobación. Igualmente, fará constar que a modificación se aprobou conforme os requisitos que para a adopción de acordos establecen os estatutos.

b) Texto íntegro dos novos estatutos, que conteña os artigos modificados, asinado polo presidente e polo secretario da asociación, e no cal se faga constar, mediante dilixencia expedida ao final do documento, que quedaron redactados coa inclusión das modificacións acordadas na asemblea xeral, e que indique a data en que se adoptou a modificación.

Sección 5.^a Inscripción da identidade dos titulares da xunta directiva ou órgano de representación

Artigo 51. Prazo de presentación da solicitude.

A solicitude de inscrición da identidade dos titulares da xunta directiva ou órgano de representación deberase presentar no prazo previsto no artigo 37.1, contado desde a adopción do respectivo acordo de elección ou nomeamento ou de se producir a variación na composición do órgano representativo.

Artigo 52. *Documentos que se deben xuntar á solicitude.*

1. Á solicitude deberase xuntar acta da asemblea xeral ou do acordo adoptado, segundo se determinase nos estatutos, en que conste a designación dos titulares da xunta directiva ou órgano de representación e a súa data, e se indique expresamente:

- a) Os datos de identidade e domicilio se son persoas físicas.
- b) A razón social ou denominación se son persoas xurídicas, cos datos de identidade das persoas físicas que actuarán no seu nome.
- c) Os cargos que teñen dentro do órgano de representación.
- d) A data da elección ou nomeamento dos titulares entrantes.
- e) A data da revogación e o cesamento, se é o caso, dos titulares saíntes.
- f) A sinatura dos titulares entrantes e, se é o caso, dos saíntes. No suposto de non se poder achegar a sinatura dos titulares saíntes, xuntarase a xustificación suficiente de tal circunstancia.

2. Cando concorran as situacións incidentais a que se refire o artigo 25, á solicitude xuntarase certificado expresivo de tales circunstancias.

3. O Rexistro poderá requirir a achega dun certificado no cal, mediante documento único e consolidado, se faga constar a relación actualizada da totalidade dos membros e cargos do órgano de representación, cando isto resulte necesario para garantir a coherencia da publicidade rexistral.

Sección 6.ª Inscripción de apertura e peche de delegacións e establecementos

Artigo 53. *Prazo de presentación da solicitude.*

A solicitude de inscrición de apertura e peche de delegacións e establecementos deberase presentar no prazo previsto no artigo 37.1, contado desde a adopción do respectivo acordo asociativo.

Artigo 54. *Documentos que se deben xuntar á solicitude.*

1. Á solicitude deberase xuntar acta da asemblea xeral ou do acordo adoptado, segundo se determinase nos estatutos, no cal conste a apertura ou peche de delegacións ou establecementos da asociación e a súa data, e se indique o domicilio social da delegación ou establecemento a que se refire a solicitude.

2. Cando simultaneamente se proceda á apertura e ao peche dunha ou varias delegacións ou establecementos, faranse constar os datos a que se refire o punto anterior respecto de cada unha deles.

3. O Rexistro poderá requirir a achega dun certificado no cal, mediante documento único e consolidado, se faga constar a relación actualizada da totalidade de delegacións e establecementos, cando isto resulte necesario para garantir a coherencia da publicidade rexistral.

Sección 7.ª Inscripción de incorporación e separación de asociacións a federacións, confederacións e unións, ou de calquera destas a entidades internacionais

Artigo 55. *Iniciativa de inscrición.*

1. A solicitude de inscrición de incorporación e separación de asociacións deberá ser realizada pola federación, confederación ou unión de asociacións de pertenza.

2. No caso de entidades internacionais, a solicitude realizaraa a propia asociación, federación, confederación ou unión de asociacións que se incorpora ou separa delas.

Artigo 56. *Prazo de presentación da solicitude.*

A solicitude deberase presentar no prazo previsto no artigo 37.1, contado desde a adopción do respectivo acordo asociativo.

Artigo 57. *Requisitos da solicitude.*

1. A solicitude de incorporación ou separación a federacións, confederacións ou unións de asociacións debe conter os seguintes datos específicos:

- a) Denominación exacta da entidade federativa e o seu domicilio.
- b) Número de inscrición da entidade federativa no Rexistro Nacional de Asociacións.
- c) Denominación, domicilio e número de inscrición da asociación que se incorpora ou separa, asignado polo correspondente rexistro de asociacións.
- d) Descrición da documentación que se xunta á solicitude.

2. A solicitude de incorporación ou separación a entidades internacionais debe conter os seguintes datos específicos:

- a) Denominación exacta da entidade asociativa e domicilio.
- b) Número de inscrición no Rexistro Nacional de Asociacións.
- c) Identificación exacta da entidade internacional de pertenza.
- d) Descrición da documentación que se xunta á solicitude.

Artigo 58. *Documentos que se deben xuntar á solicitude.*

1. Á solicitude deberase xuntar o acordo adoptado pola federación, confederación ou unión de asociacións de pertenza en que conste a aceptación da incorporación ou se resolva a separación da asociación.

Así mesmo, para o caso de incorporación, achegarase acordo adoptado pola asociación que se incorpora no cal conste a súa vontade de integrarse na federación, confederación ou unión de asociacións.

2. O Rexistro poderá requirir a achega dun certificado no cal, mediante documento único e consolidado, se faga constar a relación actualizada da totalidade de entidades que conforman a federación, confederación ou unión, cando isto resulte necesario para garantir a coherencia da publicidade rexistral.

3. Cando se trate de inscribir a pertenza a entidades internacionais, á solicitude deberase xuntar:

- a) Acordo adoptado pola entidade asociativa en que conste a súa vontade de integrarse nunha entidade internacional.
- b) Acordo do órgano de goberno da entidade ou organismo internacional, no cal conste a aceptación da incorporación.

4. Cando se trate de inscribir a separación a entidades internacionais, á solicitude deberase xuntar o acordo do órgano de Goberno da entidade ou organismo internacional, no cal conste que se aceptou ou decidiu a separación.

Sección 8.ª Inscrición de fusión de asociacións

Artigo 59. *Prazo de presentación da solicitude.*

As asociacións que decidan fusionarse deberán presentar a solicitude de inscrición no prazo previsto no artigo 37.1, contado desde a data do último acordo adoptado.

Artigo 60. *Documentos que se deben xuntar á solicitude.*

Á solicitude xuntaranse:

- a) As actas das asembleas xerais das asociacións afectadas nas cales consten os respectivos acordos de fusión e as súas datas de aprobación. Igualmente, farán constar que a fusión se aprobou conforme os requisitos que para a adopción de acordos establecen os estatutos.

b) Se se trata da formación dunha nova asociación, o acordo da asemblea xeral constituínte, ademais de todos os documentos requiridos neste regulamento para a inscrición da constitución de asociacións.

Sección 9.^a Inscrición de disolución de asociacións

Artigo 61. *Prazo de presentación da solicitude.*

O prazo previsto no artigo 37.1 contarase desde a data de concorrencia das causas previstas nos estatutos, das causas establecidas no artigo 39 do Código civil ou desde a data do acordo adoptado polos asociados en asemblea xeral convocada para o efecto.

Artigo 62. *Documentos que se deben xuntar á solicitude.*

1. Á solicitude deberase xuntar:

a) A documentación acreditativa do cesamento dos titulares da xunta directiva ou do órgano de representación.

b) En caso de disolución polas causas previstas nos estatutos, certificado expresivo dos artigos que regulan tales causas e a data en que se produciron.

c) En caso de disolución por virtude do disposto no artigo 39 do Código civil, certificado expresivo das causas determinantes dela e a data en que se produciron.

d) En caso de disolución por vontade dos asociados expresada en asemblea xeral convocada para o efecto, acta da asemblea na cal conste a data da súa aprobación. Igualmente, fará constar que a disolución se aprobou conforme os requisitos que para a adopción de acordos establecen os estatutos.

2. Se no momento da disolución a entidade dispón de patrimonio, á solicitude tamén se deberá xuntar a documentación acreditativa:

a) Da aceptación e da identidade das persoas encargadas da liquidación.

b) Da situación patrimonial da asociación e do sinalamento, se é o caso, da existencia de acredores.

c) Do destino que se vai dar ao patrimonio conforme o establecido nos estatutos.

3. Unha vez concluídas as operacións previstas no artigo 18.3 da Lei orgánica 1/2002, do 22 de marzo, os liquidadores solicitarán a cancelación dos asentos rexistrados e xuntarán documento xustificativo da aplicación do patrimonio remanente, de ser o caso.

4. Se no momento da disolución a entidade carece de patrimonio, indicárase expresamente esta circunstancia na solicitude e non será necesario xuntar a documentación prevista no número 2.

Sección 10.^a Inscrición de delegacións en España de asociacións estranxeiras

Artigo 63. *Solicitude.*

As asociacións estranxeiras que actúen en España de forma estable ou duradeira deberán comunicar ao Rexistro a apertura, traslado ou peche de delegacións en territorio español.

Artigo 64. *Documentos que se deben xuntar á solicitude.*

1. Cando se trate de apertura de delegacións, á solicitude deberase xuntar a seguinte documentación:

a) A xustificativa de que se encontra validamente constituída a asociación de acordo coa súa lei persoal, mediante a achega do documento que acredite a vixencia da inscrición, aprobación, legalización ou recoñecemento, expedida pola autoridade competente do país de orixe.

- b) Os estatutos ou documento análogo que regule a organización e o funcionamento da asociación.
- c) O acordo do órgano competente da asociación polo cal se aprobe abrir unha delegación en España e a súa data de adopción.
- d) A acreditativa da identidade dos representantes en España e a xustificativa das súas facultades de representación.
- e) O domicilio da delegación en España.

A documentación referida nas alíneas a) e b) deberase presentar debidamente legalizada conforme a normativa sobre legalización de documentos públicos estranxeiros.

2. Cando se trate do traslado de delegacións dentro de España, á solicitude deberase xuntar o acordo do órgano competente da asociación polo cal se decida trasladar a delegación e se indique o novo domicilio.

3. Cando se trate do peche de delegacións, á solicitude deberase xuntar o acordo do órgano competente da asociación polo cal se decida pechar a delegación en España, con indicación da data de efectos da clausura.

Artigo 65. *Obrigas da asociación estranxeira.*

As asociacións estranxeiras que actúen en España mediante delegacións quedan obrigadas a solicitar a actualización dos seus datos conforme o disposto no artigo 28.4 da Lei orgánica 1/2002, do 22 de marzo.

Artigo 66. *Lingua do procedemento.*

Tanto as solicitudes como os documentos que se xunten a elas serán presentados polos interesados en lingua castelá.

CAPÍTULO III

Inscricións de oficio

Artigo 67. *Resolucións xudiciais.*

1. En aplicación do artigo 41 da Lei orgánica 1/2002, do 22 de marzo, os xulgados e tribunais comunicarán ao Rexistro Nacional de Asociacións as resolucións que afecten actos susceptibles de inscrición rexistral e, en particular, as que determinen:

- a) A inscrición das asociacións.
- b) A modificación de calquera dos contidos dos estatutos das asociacións inscritas.
- c) O peche de calquera dos seus establecementos.
- d) A suspensión de actividades e a súa revogación, e a disolución das asociacións inscritas.

2. Sen prexuízo da inscrición que lle sexa ordenada polo órgano xudicial, o Rexistro anotará o tipo de resolución, a data, a autoridade que a ditou e o contido da resolución ou parte dispositiva.

3. A inscrición da suspensión de actividades acordada mediante resolución xudicial firme comportará o peche provisional da folla rexistral.

4. A inscrición da disolución acordada mediante resolución xudicial firme comportará a cancelación de todos os asentos da asociación e o peche definitivo da súa folla rexistral.

Artigo 68. *Utilidade pública das asociacións.*

O Rexistro inscribirá a declaración e a revogación da condición de utilidade pública das asociacións de ámbito estatal a partir da publicación das correspondentes resolucións no «Boletín Oficial del Estado».

Disposición adicional primeira. *Aplicación supletoria.*

No non expresamente previsto neste regulamento, os procedementos de inscrición rexeranse pola lexislación reguladora do procedemento administrativo común das administracións públicas.

Disposición adicional segunda. *Modelos de solicitude e de documentos.*

1. A Secretaría Xeral Técnica, a través da páxina web do Ministerio do Interior, poñerá á disposición dos cidadáns un modelo de solicitude para cada procedemento de inscrición.

2. Así mesmo, publicará modelos de acta fundacional, estatutos e certificados, con carácter simplemente orientativo.

3. Os modelos regulados nos dous puntos anteriores deberán estar dispoñibles en formato electrónico accesible para as persoas con discapacidade.

Disposición adicional terceira. *Taxas.*

1. A inscrición e a publicidade rexistral estarán suxeitas ao pagamento previo das taxas establecidas no artigo 35 da Lei 13/1996, do 30 de decembro, de medidas fiscais, administrativas e da orde social.

2. O documento acreditativo do aboamento da taxa axustarase ao correspondente modelo de autoliquidación aprobado polo Ministerio de Facenda e Administracións Públicas.

Disposición adicional cuarta. *Denominacións.*

As asociacións inscritas no Rexistro Nacional de Asociacións que acorden modificar a súa denominación deberanse axustar ao disposto nos artigos 22 e 23 deste regulamento.

Disposición adicional quinta. *Transformación de asociacións autonómicas e especiais.*

As asociacións inscritas nos rexistros autonómicos e especiais de asociacións que, en virtude dun proceso de transformación, soliciten a súa inscrición no Rexistro Nacional de Asociacións quedarán suxeitas e seralles aplicable todo o disposto neste regulamento.

Disposición adicional sexta. *Adaptación de estatutos e declaración de actividade e funcionamento.*

1. As asociacións inscritas no Rexistro Nacional de Asociacións con anterioridade á vixencia da Lei orgánica 1/2002, do 22 de marzo, que soliciten inscribir a adaptación de estatutos ao disposto na dita lei orgánica deberán seguir o procedemento de modificación de estatutos regulado neste regulamento.

2. Respecto das asociacións referidas no punto anterior que non presentasen a declaración de actividade e funcionamento prevista no número 2 da disposición transitoria primeira da Lei orgánica 1/2002, do 22 de marzo, nin ningunha outra solicitude ou comunicación ao Rexistro antes da entrada en vigor deste regulamento, practicarase nota marxinal expresiva de tal circunstancia.

A nota marxinal cancelarase na respectiva folla rexistral cando as asociacións presenten a declaración de actividade e funcionamento.

Disposición adicional sétima. *Asociacións de consumidores e usuarios.*

1. Os expedientes das asociacións de consumidores e usuarios inscritas no Rexistro Nacional de Asociacións, que igualmente figuran inscritas no Rexistro Estatal de Asociacións de Consumidores e Usuarios, serán transferidos polo Ministerio do Interior á Axencia Española de Consumo, Seguridade Alimentaria e Nutrición do Ministerio de Sanidade, Servizos Sociais e Igualdade. Ao mesmo tempo, suprimirase o nome de tales asociacións do ficheiro de denominacións.

2. A partir da entrada en vigor deste regulamento, o Rexistro Estatal de Asociacións de Consumidores e Usuarios será o competente para acordar a inscrición dos actos de modificación dos aspectos rexistrados que consten en tales expedientes, así como, de ser o caso, da disolución das respectivas entidades.

Disposición transitoria primeira. *Asociacións en proceso de inscrición e actos pendentes de inscrición de asociacións xa inscritas.*

As solicitudes de inscrición de constitución de asociacións e de inscrición de actos de asociacións xa inscritas no Rexistro Nacional de Asociacións, presentadas con anterioridade á entrada en vigor deste regulamento, tramitaranse e resolveranse de acordo coa normativa vixente no momento da súa presentación.

Disposición transitoria segunda. *Clasificación de actividades.*

No prazo de tres meses desde a entrada en vigor deste regulamento e conforme os códigos de actividades que se aproban como anexo a el, procederase de oficio á clasificación das entidades xa inscritas no Rexistro Nacional de Asociacións.

ANEXO

Códigos de actividades

1. IDEOLÓXICAS, CULTURAI, EDUCATIVAS E DE COMUNICACIÓN.

11. IDEOLÓXICAS.

- 111. DEREITOS HUMANOS, LIBERDADES PÚBLICAS.
- 112. PROMOCIÓN DA CALIDADE DEMOCRÁTICA.
- 113. PROMOCIÓN DA CONVIVENCIA E DA TOLERANCIA.
- 114. CÍVICO-POLÍTICAS.
- 115. PACIFISTAS.
- 116. DE BASE RELIXIOSA.
- 117. DE BASE FILOSÓFICA.
- 118. REFERIDAS A TEMAS MILITARES.
- 119. OUTRAS.

12. CULTURAI.

- 121. ARTES.
- 122. HUMANIDADES.
- 123. CIENCIAS.
- 124. DEFENSA DO PATRIMONIO.
- 125. MUSICAIS.
- 126. TEATRO, ESPECTÁCULOS.
- 127. HISTÓRICAS.
- 128. CULTURA POPULAR, GASTRONOMÍA.
- 129. OUTRAS.

13. EDUCATIVAS.

- 131. NAIS E PAIS DE ALUMNOS.
- 132. ESTUDANTES.
- 133. PROMOCIÓN DO ENSINO.
- 134. SOCIOEDUCATIVAS.
- 135. OUTRAS.

14. DE COMUNICACIÓN.
 141. AUDIOVISUAIS, RADIO, TV.
 142. INTERNET.
 143. REDES SOCIAIS.
 144. OUTRAS.
2. MULLER, IGUALDADE DE TRATO E NON DISCRIMINACIÓN.
 21. MULLER.
 211. IGUALDADE DE TRATO E DE OPORTUNIDADES ENTRE MULLERES E HOMES, VIOLENCIA DE XÉNERO.
 212. OUTRAS.
 22. IGUALDADE DE TRATO E NON DISCRIMINACIÓN POR OUTROS MOTIVOS.
 221. XENOFOBIA, DISCRIMINACIÓN RACIAL OU ÉTNICA.
 222. ORIENTACIÓN SEXUAL E IDENTIDADE DE XÉNERO.
 223. IDEOLOXÍA, RELIXIÓN OU CRENZAS.
 224. OUTRAS.
3. INFANCIA, MOCIDADE, PERSOAS MAIORES, FAMILIA E BENESTAR.
 31. INFANCIA.
 311. INFANCIA.
 32. MOCIDADE.
 321. MOCIDADE.
 33. PERSOAS MAIORES.
 331. PERSOAS MAIORES.
 34. FAMILIA.
 341. FAMILIA.
 35. BENESTAR.
 351. BENESTAR PERSOAL.
 352. BENESTAR SOCIAL, MELLORA DAS CONDICIÓNS DE VIDA.
 353. DESENVOLVEMENTO COMUNITARIO.
 354. URBANISMO, VIVENDA.
 355. OUTRAS.
4. AMBIENTE E SAÚDE.
 41. AMBIENTE.
 411. DEFENSA DO AMBIENTE, ECOLOXISTAS, CONSERVACIONISTAS.
 412. PROTECCIÓN DE ANIMAIS E PLANTAS.
 413. DESENVOLVEMENTO SUSTENTABLE.
 414. OUTRAS.
 42. SAÚDE.
 421. INVESTIGACIÓN.
 422. SERVIZOS SANITARIOS.
 423. PREVENCIÓN E ACCIÓN CONTRA ENFERMIDADES.

- 424. PREVENCIÓN E ACCIÓN CONTRA DEPENDENCIAS.
- 425. NATURISMO, MEDICINAS ALTERNATIVAS.
- 426. PROMOCIÓN DA SAÚDE.
- 427. OUTRAS.

- 5. DISCAPACIDADE E DEPENDENCIA.

- 51. DEREITOS.

- 511. DEREITOS DE PERSOAS CON DISCAPACIDADE E/OU EN SITUACIÓN DE DEPENDENCIA.

- 52. ASISTENCIAIS.

- 521. ASISTENCIAIS A PERSOAS CON DISCAPACIDADE E/OU EN SITUACIÓN DE DEPENDENCIA.

- 53. OUTRAS.

- 531. OUTRAS REFERIDAS A DISCAPACIDADE E/OU DEPENDENCIA.

- 6. VÍTIMAS, AFECTADOS E PREXUDICADOS.

- 61. VÍTIMAS.

- 611. VÍTIMAS DE DELITOS.
- 612. VÍTIMAS DO TERRORISMO.
- 613. VÍTIMAS DE ACCIDENTES.
- 614. OUTRAS.

- 62. AFECTADOS, PREXUDICADOS.

- 621. AFECTADOS, PREXUDICADOS.

- 7. SOLIDARIEDADE.

- 71. ACCIÓN SOCIAL, VOLUNTARIADO.

- 711. ACCIÓN SOCIAL, VOLUNTARIADO.

- 72. INTEGRACIÓN SOCIAL

- 721. INTEGRACIÓN SOCIAL DE INMIGRANTES, MINORÍAS
- 722. REINSERCIÓN SOCIAL DE PENADOS
- 723. INCLUSIÓN SOCIAL

- 73. COOPERACIÓN AO DESENVOLVEMENTO.

- 731. COOPERACIÓN AO DESENVOLVEMENTO, CODESENVOLVEMENTO.
- 732. AXUDA HUMANITARIA.

- 74. PROTECCIÓN CIVIL.

- 741. PROTECCIÓN CIVIL.

- 75. EMIGRACIÓN.

- 751. EMIGRACIÓN.

- 76. INSERCIÓN LABORAL.

- 761. INSERCIÓN LABORAL.

- 77. OUTRAS.
- 771. OUTRAS DE SOLIDARIEDADE.
- 8. ECONÓMICAS, TECNOLÓXICAS, DE PROFESIONAIS E DE INTERESES.
- 81. ECONÓMICAS.
 - 811. AGRICULTURA, GANDARÍA, SILVICULTURA, CAZA, PESCA.
 - 812. INDUSTRIA, ENERXÍA, TRANSPORTE.
 - 813. COMERCIO.
 - 814. SERVIZOS.
 - 815. TURISMO.
 - 816. ECONOMÍA SOCIAL, RESPONSABILIDADE SOCIAL CORPORATIVA.
 - 817. EMPREGO.
 - 818. EMPRENDEMENTO.
 - 819. OUTRAS.
- 82. TECNOLÓXICAS.
 - 821. CIENCIA, TECNOLOXÍA, TIC.
 - 822. INVESTIGACIÓN, DESENVOLVEMENTO, INNOVACIÓN.
 - 823. TELECOMUNICACIÓNS.
 - 824. OUTRAS.
- 83. DE PROFESIONAIS.
 - 831. XURISTAS.
 - 832. MÉDICOS, FARMACÉUTICOS, OUTROS SANITARIOS.
 - 833. ENXEÑEIROS.
 - 834. ARQUITECTOS.
 - 835. ENSINO.
 - 836. OUTRAS.
- 84. DEFENSA DE INTERESES.
 - 841. MELLORA DOS SERVIZOS PÚBLICOS.
 - 842. USUARIOS DE SERVIZOS PRIVADOS, CONSUMO.
 - 843. MUNICIPIOS E PROVINCIAS.
 - 844. PROPIETARIOS, VECIÑOS.
 - 845. REIVINDICATIVAS.
 - 846. OUTRAS.
- 9. DEPORTIVAS E RECREATIVAS.
- 91. DEPORTIVAS.
 - 911. FOMENTO DO DEPORTE, DESENVOLVEMENTO DEPORTIVO.
 - 912. DEPORTISTAS, EX-DEPORTISTAS.
 - 913. SOCIOS, SEGUIDORES.
 - 914. OUTRAS.
- 92. RECREATIVAS.
 - 921. CÍRCULOS, CLUBS, CASAS REXIONAIS.
 - 922. FESTEXOS, OCIO, TEMPO LIBRE.
 - 923. TAURINAS.
 - 924. AFECCIÓNS EN XERAL.
 - 925. OUTRAS.

10. VARIAS.
101. FILIAIS DE ASOCIACIÓNS ESTRANXEIRAS.
102. ASOCIACIÓNS VINCULADAS A ORGANIZACIÓNS INTERNACIONAIS.
103. OUTRAS.